

Edicto Enque se declara la forma  
Conque debe guardarse la Clausura  
en los Conuentos de Religiosas y  
las penas Enque incurrén los  
transgressores.

Handwritten text, likely a list or index, written in a cursive script. The text is mirrored across the page, suggesting it was written on a single sheet of paper and then scanned. The content is mostly illegible due to the handwriting and the mirroring effect.

# CONFIRMATIO, ET INNOVATIO CONSTITUTIONIS

Incipientis: *Ex illa die:*


## A CLEMENTE PAPA XI.

*In Causa Rituum, seu Cereemoniarum Sinenſium editæ.*


### NEC NON

Revocatio, reſciſſio, abolitio, caſſatio, annullatio; ac damnatio  
Permiſſionum ſuper iisdem Ritibus, ſeu Ceremoniis, in quadam  
Paſtorali Epiſtola Caroli Ambroſii Mediobarbi, Patriarchæ  
Alexandri, olim Comiſſarii, & Viſitatoris  
Apoſtolici in Sinarum Imperio  
contentarum.

*Cum præſcriptione novæ formulæ Juramenti per Miſſionarios illarum  
partium præſentes, & futuros præſtandi.*



HISPALI EX TRANSMPTO ROMÆ EXCUSO MDCCXLII.



\* Ex Typographia de los RECIENTES in vico de la Pajería. \*





# BENEDICTUS

## P A P A XIV.

*Ad perpetuam rei memoriam.*



**X** QUO SINGULARI DEI PROVIDENTIA factum est, ut Orientalium, & Occidentalium Indiarum Regiones Europæ innotescerent, Apostolica Sancta Sedes, quæ ab ipsis Ecclesiæ incunabulis Evangelicæ veritatis lumen ubique diffundere, & illud ab omni erroris umbra servare maximo studio curavit, in his quodque novissimis temporibus Evangelicos Operarios in antedictas Regiones sedulo misit: ut Idololatria, ibi latè dominante, funditus eradicata Christianæ Fidei semen opportunè spargerent, atque horrentes illos, & insultos campos in fertiles, florentesque vineas, uberrimos æternæ vitæ fructus daturas, commutarent. Ex Regionibus autem illis, quas Sancta Sedes præ cæteris ante oculos habuit, fuit profecto amplissimum Sinarum Imperium: in quo quidem negari non potest, quin Christiana Fides progressus ingentes fecerit, longè etiam majores factura; nisi coorta inter Operarios, à Sancta Sede illuc missos, dissidia cursum interciderent.

Occasionem dissidiis ejusmodi dederunt Cæremoniæ quædam, & Ritus, quibus Sinenfes ad Confucium Philosophum, & Majores suos honoribus prosequendos uti consueverunt: cum nonnulli ex Missionariis contenderent, eas esse Cæremonias, & Ritus merè civiles, adeoque concedendos iis, qui, relicto Idolorum cultu, Christianam Religionem amplectebantur; contra verò alii eos, utpotè superstitionem olentes, sine gravi Religionis injuria perimitti nullo modo posse assererent. Quæ sanè controversia multis annis Apostolicæ Sedis curam, & sollicitudinem ad se traxit; cum id maximè caveat, nè zizania in agro Dominico radices agant, aut, si fortè egerint, ea, quàm citò fieri potest, evellantur.

Primò itaque ad Sanctæ Sedis Tribunal Causam hanc detulerunt ii, qui Cæremonias illas, & Ritus Sinicos superstitione imbutos suspicabantur. Super illis dubia nonnulla proposita fuerunt Congregationi de Propaganda Fide, quæ anno 1645. comprobavit responsa, ac decisiones Theologorum, qui Cæremonias, & Ritus eosdem superstitione re vera infectos judicarunt. Proinde Innocentius Papa X. ad præfatæ Congregationis preces, omnibus, & singulis Missionariis sub poena excommunicationis latæ sententiæ, sibi, ac Sanctæ Sedi reservatæ, mandavit, ut responsa, ac decisiones prædictas omnino observarent, easque ad praxim deducerent, donec sibi, & Apostolicæ Sedi aliter visum non esset.

Verùm paulò post ab aliis ejusdem Missionis Operariis alia dabilia ejusdem Ritibus, & Cæremoniis ipsimet Congregationi de Propaganda Fide fuerunt exhibita, ex quibus Cæremoniæ ipsæ, Ritufque nullam in se superstitionem habere videbantur. Negotium itaque hujusmodi ab Alexandro Papa VII. Sacræ Inquisitionis Congregationi commissum fuit: quæ, prout varia, diversaque ratione fuerat sibi de iisdem Cæremoniis expositum, alias quidem tamquam merè civiles, & politicas esse permittendas; alias

4.  
verò tolerari posse judicavit: idemque Alexander Pontifex anno 1656. hanc sententiam probavit, & confirmavit.

Sed ecce tertio ad Sanctam Sedem hæc eadem controversia. Cum plura dubia Sacre Inquisitionis Congregationi proposita fuissent, illud quodque ab ea quaesitum fuit, utrum adhuc vigeret Innocentii Papæ X. præceptum, quo sub pœna excommunicationis lata sententiæ mandabat observantiam responsionum, ac decisionum, quæ à Congregatione de Propaganda anno 1645. ut supra dictum est, emanaverant. Præterea, an, stantibus recens expositis dubiis, earum praxis retinenda foret: cum præsertim ob stare videretur Decretum Sacre Inquisitionis, quod ab ea emanavit anno 1656. super quaestis nonnullis diversa ratione, aliisque circumstantiis propositis ab Operariis Apostolicis, in Sinarum Regno commorantibus. Respondit ad hæc Sacre Inquisitionis Congregatio anno 1669. præfatum Congregationis de Propaganda Fide Decretum adhuc vigere, habita ratione rerum, quæ fuerunt in dubiis expositæ; neque illud fuisse circumscriptum à Decreto Sacre Inquisitionis, quod anno 1656. emanavit; immo esse omnino observandum juxta quaesita, circumstantias, & omnia ea, quæ in antedictis Dubiis continentur. Declaravit pariter, eodem modo esse observandum prædictum Sacre Congregationis Decretum anni 1656. juxta quaesita, circumstantias, & reliqua in ipsis expressa. Hoc autem Decretum Clemens Papa IX. comprobavit.

Cum autem omnia præfata Decreta pro varia rerum expositarum ratione fuerint facta, ac promulgata, tantum absuit, ut Rituum Sinensium controversia finem obtineret, ut magis illa vires, & incrementum acquireret. Nam scicis Evangelicis Operariis in partes, adducta res fuit in acriorem animorum, ac sententiarum contentionem. Arque hinc, non sine gravi scandalo, magnoque Fidei damno, consecuta est prædicatio non uniformis, & non eadem ubique Christianorum illorum disciplina, & institutio. De his autem absurdis certior factus Innocentius Papa XII. Prædecessor noster, id muneris sui omnino esse putavit, ut perniciosus adeo disidiis finis daretur; proinde exactam, maximèque accuratam totius hujus controversiæ discussionem Sacre Inquisitionis Congregationi commisit. Cumque nihil intentatum reliquisset, quo sinceram facti notitiam obtineret, firmata quodque fuerunt de illius mandato summa cum diligentia Quaesita, quæ per eandem Sacram Congregationem resolverentur.

Quæstorum illorum examen Innocentii Papæ XII. mors intercepit. Clemens autem XI. qui successit, Prædecessoris sui zelo plenus, coram se quæstorum eorundem examen fieri voluit. Quamobrem post diuturnam, maturam, & accuratissimam rei discussionem, post auditas ex utraque parte rationes, quibus liberè producendis unicuique locus amplissimus datus fuit, idem Clemens Papa XI. anno 1704. confirmavit, & Apostolica autoritate comprobavit præmemoratæ Sacre Congregationis responsiones ad omnia, & singula quaesita proposita, quibus Ritus Sinenses, utpotè superstitione imbuti, prohibebantur; mandavitque præfatas responsiones ad Carolum Thomam de Tournon, Antiochiæ Patriarcham, Commissarium, & in Sinarum Regno Visitatorem Apostolicum transmitti; ut nimirum exactam earundem observantiam omnibus, & singulis Missionariis, pœnis quodque Canonis in refractarios indictis, præciperet.

Promulgavit quidem Patriarcha Antiochenus decisionem Apostolicam, addito Decreto, quo ab universis ejus observantiam exigebat. Cum autem illam tentassent eludere, variisque inanibus rationibus effugere ii, qui Sinenses Ritus, tamquam politicos, ac merè civiles propugnauerant, prædictus Pontifex Clemens XI. Decreto, quod per Sacre Inquisitionis Congregationem emanavit anno 1710. præcepit omnimodam, & inviolabilem earundem responsionum ab se Apostolica autoritate confirmatarum observantiam, & alia, quæ Decreto ipso continentur, quod est tenoris sequentis:



# D E C R E T U M

5.

*Super omnimoda, ac inviolabili observatione Responsorum aliàs in Causa Rituum, seu Cæremoniarum Sinensium à Sacra Congregatione datorum, & à Sanctissimo approbatorum cum aliis Ordinationibus.*

*Feria 7. die xxv. Septembris. MDCCX.*

*In Congregatione Generali Sanctæ Romanæ, & Universalis Inquisitionis habita in Palatio Apostolico Quirinali coram Sanctissimo Domino nostro D. Clemente, Divina Providentia Papa XI. ac Eminentissimis, & Reverendissimis DD. S. R. E. Cardinalibus, in tota Republica Christiana contra hæreticam pravitatem Generalibus Inquisitoribus à Sancta Sede Apostolica specialiter deputatis.*

*Idem Sanctissimus Dominus noster in Causa Rituum, seu Cæremoniarum Sinensium, auditis tam in Congregationibus anno præterito non semel, quam in aliis, mense, & anno præsentibus pluries coram Sanctitate Sua habitis, præfatorum Eminentissimorum, & Reverendissimorum DD. Cardinalium, qui rem maturè, ac diligentissimè discusserunt, sententiis, decrevit, & declaravit, responsa aliàs in Causa hujusmodi ab eadem Congregatione data, & à Sanctitate Sua die 20. Novembris 1704. confirmata, & approbata, necnon Mandatum, seu Decretum ab Eminentissimo, & Reverendissimo Domino D. Cardinali de Tournon, tunc Patriarcha Antiocheno, Commissario, & Visitatore Apostolico Generali in Imperio Sinarum die 25. Januarii 1707. hac de re editum, ab omnibus, & singulis, ad quos spectat, inconcussè, & inviolabiliter, sub censuris, & penis in Mandato, seu Decreto hujusmodi expressis, observanda esse, quovis contra faciendi quesito colore, seu prætextu penitus sublato, ac potissimum non obstante quacumque appellatione à quibuscumque personis sive Sacralibus, sive Regularibus, etiam specificis, & individua mentione, & expressione dignis, ac quavis Ecclesiastica dignitate fulgentibus, ad Sedem Apostolicam interposita, quam propter Sanctitatis Suae rejiciendam esse decrevit, ac re ipsa rejecit. Porro cum idem D. Cardinalis de Tournon in suo Mandato, seu Decreto supraddicto Apostolica decisioni die 20. Novembris 1704. latè se expressè inherere professus fuerit, Sanctitas Sua ulterius declaravit, ipsum Mandatum, seu Decretum unà cum censuris in eo contentis ad normam eorundem Responsorum accipiendum esse, ità ut nihil per illud responsis præfatis additum, seu detractum fuisse censendum sit, ac omnia, quæ in eis insunt, etiam in Mandato, seu Decreto prædicto inesse intelligantur. Caterum Sanctitas Sua, tametsi non sine ingenti animi sui mæore acceperit, quoddam humani generis hostis multiplicia in die zigania in latissimis illis Regionibus superseminare non cessat; non tamen propterea in eis Catholicæ Religionis propagandæ saluberrimum, ac sanctissimum opus ullatenus deserere volens, sed illud majori, quæ potest, animi contentione, ac studio, iisque potissimum dissidiis, quibus inibi Christianæ Fidei seges veluti spinis suffocatur, prorsus submotis, ardentius, semper, & enixius promovere cupiens, congruam super præmissis, aliisque ad ea pertinentibus Instructionem conscribi, illamque dicto D. Cardinali de Tournon, quatenus adhuc in illis partibus commoretur, sin minus, illi, qui ejus loco deputatus fuerit, necnon Episcopis, & Vicariis Apostolicis eorundem partium transmitti mandavit, quæ non minus debite Apostolicorum Decretorum executioni, quàm Missionariorum concordia, Evangelicæ veritatis prædicationi, atque animarum salutis opportunè consulatur. Demum, ut nimia illi de his rebus scribendi licentiæ, quæ non sine Fidelium scandalo inter Partes diuturna contentione exasperatas invaluit, modus imponatur, Sanctitas Sua discripse præcipit omnibus, & singulis cujusvis Ordinis, Congregationis, Instituti, & Societatis, etiam de necessitate exprimendæ, Regularibus, aliisque quibuscumque Sacralibus Personis, tam Ecclesiasticis, quam Laicis, cujuscumque tandem status, gradus, conditionis, & dignitatis existant, ut in posterum non audeant sub quovis quesito colore, vel prætextu imprimere, vel quoquo modo in lucem edere Libros, Libellos, Relationes, Theses, Folia, seu Scripta quacumque, in quibus ex professo, vel incidenter de Ritibus Sinicis hujusmodi, vel de controversiis desuper, seu illorum occasione exortis quomodolibet tractetur, sine expressa, & speciali licentiâ à Sanctitate Sua, seu pro tempore existente Romano Pontifice in Congregatione supraddictâ Sanctæ, & Universalis Inquisitionis obti-*

obtinenda. Ut autem ejusmodi prohibitio inviolabiliter observetur, eadem Sanctitas Sua voluit, & declaravit, contravenientes quoscumque excommunicationis latae sententiae Regulares verò etiam privationis vocis activae, & passivae pœnas ipso facto absque alia declaratione incurrere, & nihilominus aliis etiam pœnis Sanctitatis Suae, & Successorum suorum Romanorum Pontificum arbitrio insignendis subjacere. Libros porro, Libellos, Relationes, Theses, Folia, ac Scripta quaecumque, quae in futurum contra praesentis prohibitionis tenorem edi contigerit ( citra ullam aliorum hactenus editorum approbationem, super quibus opportunè providebitur ) pro expressè prohibitis haberi voluit, absque alia declaratione sub pœnis, & censuris in Regulis Indicis Librorum prohibitorum contentis. Impressores verò, præter Scriptorum sic impressorum amissionem, pecuniariis, aliisque corporalibus pœnis, juxta criminis gravitatem, teneri mandavit. In contrarium facientibus non obstantibus quibuscumque.

Joseph Bartolus, Sanctae Romanae, & Universalis Inquisitionis Notarius.

At verò nec Decretum hujusmodi ad difficiles animos subjiciendos valuit. Itaque Clemens idem Papa XI. quò illos tandem aliquando franaret, Constitutionem anno 1715. evulgavit, qua solemniter iterum confirmavit antedictas Sacrae Inquisitionis responsiones, easque exactè, & ad amissim observari mandavit, præclusis omnibus iis effugiis, quibus perfectam earum observantiam contumaces homines aliquo pacto evadere potuissent; & est tenoris, qui sequitur:

### CLEMENTIS PAPAE XI.

Præceptum super omnimoda, absoluta, integra, & inviolabili observatione eorum, quæ aliàs à Sanctitate Sua in Causa Rituum, seu Cæremoniarum Sinensium decreta fuerunt: cum rejectione quarumcumque rationum, seu excusationum ad ejusmodi Decretorum executionem declinandam allatarum, ac præscriptione formula Juramenti per Missionarios illarum partium praesentes, & futuros hac in re præstandi.

### CLEMENS PAPA XI.

*Ad futuram rei memoriam.*

Ex illa die, qua, nullo licet meritum nostrorum suffragio, Catholica Ecclesiæ gubernacula, hoc est, munus sua amplitudine gravissimum, ac temporum iniquitate molestissimum, Deo sic disponente, suscepimus, nihil Nobis manum claro admoventibus antiquius fuit, quam acerrimas contentiones jampridem in Imperio Sinarum inter Apostolicos illarum partium Missionarios exortas, semperque in dies magis invalescentes, tam circa quasdam voces Sinicas ad sanctum, & ineffabile Dei nomen exprimendum inibi usurpatas, quam circa nonnullos earum gentium Ritus, veluti supersticiosos à quibusdam ex Missionariis prædictis reprobatos; ab aliis verò, utpotè eos civiles tantum asserentibus, permissos, Apostolici Judicii censura opportunè dirimere, ut, sublatis disidiis, Christianae Religionis, Catholicaeque Fidei propagationem turbantibus, omnes tandem id ipsum dicerent in eodem sensu, & in eadem sententia, unoque ore glorificaretur Deus ab iis, qui Sanctificati sunt in Christo Jesu.

Hoc consilio responsa illa, quæ ad varias quæstiones super ejusmodi rebus excitatas, prævio diuturno examine, dudum, videlicet tempore fel. record. Innocentii Papæ XII. Prædecessoris nostri inchoato, ac deinde jussu nostro per plures annos continuato, auditisque utriusque Partis rationibus, necnon complurium Theologorum, & Qualificatorum sententiis à Congregatione Venerabilium Fratrum nostrorum Sanctae Romanae Ecclesiæ Cardinalium in tota Republica Christiana Generalium Inquisitionum adversus hæreticam pravitatem autoritate Apostolica deputatorum data fuerunt, Nos die 20. Novembris 1704. eadem autoritate confirmavimus, & approbavimus.

Ea autem, quæ in responsis hujusmodi decreta fuerunt, sunt, quæ sequuntur: Cum Deus Optimus Maximus congruè apud Sinas vocabulis Europæis exprimi nequeat, ad eundem verum Deum significandum, vocabulum *Tien Chû*, hoc est, Cæli Dominus, quod à Sinensibus Missionariis, & Fidelibus longo, ac probato usu receptum esse dignoscitur, admittendum esse: nomina verò *Tien Cœlum*, & *Xang Tè Supremus Imperator*, penitus rejicienda.



Ideirco Tabellas cum inscriptione Sinica *King Tien*, Coelum colito, in Ecclesiis Christianorum appendi, seu jam appensas in posterum inibi retineri permittendum non esse.

Ad hæc nullatenus, nullaque de causa permittendum esse Christi Fidelibus, quod præstint, ministrent, aut intersint solemnibus Sacrificiis, seu Oblationibus, quæ à Sinensibus in utroque æquinoctio ejusdemque anni Confucio, & Progenitoribus defunctis fieri solent, tamquam superstitione imbutis. Similiter nec esse permittendum, quod in *Ædibus Confucii*, quæ Sinico nomine *Miao* appellantur, iidem Christi Fideles exerceant, ac peragant Cæremonias, Ritus, & Oblationes, quæ in honorem ejusdem Confucii fiunt: tum singulis mensibus in Novilunio, & Plenilunio à Mandarinis, seu primariis Magistratibus, aliisque Officialibus, & Literatis: tum ab eisdem Mandarinis, seu Gubernatoribus, ac Magistratibus, antequàm dignitatem adeant, seu saltèm post ejus possessionem adeptam: tum denique à Literatis, qui postquàm ad gradus sunt admissi, è vestigio ad Templum, seu *Ædem Confucii* se conferunt.

Præterea non esse permittendum Christianis in Templis, seu *Ædibus* Progenitoribus dicatis, Oblationes minis solemnnes eisdem facere, nec in illis ministrare, aut quomodolibet inservire, vel alios Ritus, & Cæremonias peragere.

Item nec esse permittendum præfatis Christianis Oblationes, Ritus, & Cæremonias hujusmodi coram Progenitorum Tabellis in privatis domibus, sive in eorumdem Progenitorum sepulchris, sive antequàm defuncti sepultura tradantur, in eorum honorem fieri consuetas, unà cum Gentilibus, vel seorsum ab illis peragere, eisque ministrare, aut interesse; immo prædicta omnia, utpotè quæ, perpenis hinc inde deductis, necnon diligenter, ac maturè discussis omnibus, ita peragi comperta sunt, ut à superstitione separari nequeant, Christianæ Legis Cultoribus nè quidem permittenda esse, præmissa publica, vel secreta protestatione, se, non religioso: sed civili, ac politico tantum cultu erga defunctos illa præstare, nec ab eis quidquàm petere, aut sperare.

Non tamen per hæc censendam esse damnatam præsentiam illam, seu assistentiam merè materiale, quam cum Gentilibus superstitione peragentibus, citra ullam, sive expressam, sive tacitam gestorum approbationem, ac quovis ministerio penitus secluso, eisdem superstitionis actibus quandoque præstari contingat à Christianis, cum aliter odia, & inimicitie vitari non possunt: facta tamen prius, si commodè fieri poterit, Fidei protestatione, ac cessante periculo subversionis.

Denum permittendum non esse Christi Fidelibus Tabellas defunctorum Progenitorum in suis privatis domibus retinere, juxta illarum partium morem, hoc est, cum inscriptione Sinica, qua Thronus, seu Sedes Spiritus, vel Animæ N. significetur; immo nec cum alia, qua Sedes, seu Thronus, adeoque idem, ac priori, licèt magis contracta inscriptione, designari videatur. Quò verò ad Tabellas solo defuncti nomine inscriptas, tolerari posse illarum usum, dummodò in eis conscribendis omittantur omnia, quæ superstitionem redolent, & secluso scandalo, hoc est, dummodò, qui Christiani non sunt, arbitrari non possint, Tabellas hujusmodi à Christianis retineri ea mente, qua ipsi illas retinent, necnon adjecta insuper declaratione ad latus ipsarum Tabellarum apponenda, qua, & quæ sit Christianorum de defunctis fides, & qualis Filiorum, ac Neporum in Progenitores pietas esse debeat, enuntietur.

Per præmissa nihilominus non vetari, quominus erga defunctos peragi possint alia, si quæ sint, ab iis Gentibus peragi consueta, quæ verè superstitione non sint, nec superstitionis speciem præferant; sed intra limites civilium, & politicorum Rituum contineantur. Porro quanam hæc sint, & quibus adhibitis cautelis tolerari valeant, tum pro tempore existentis Imperio Sinarum, tum Episcoporum, & Vicariorum Apostolicorum illarum partium judicio relinquendum esse: qui tamen interea omni, quo poterunt studio, ac diligentia curare debebunt, ut Gentium Cæremoniis penitus sublati, illis sensim à Christianis, & pro Christianis hac in re usu recipiantur Ritus, quos Catholica Ecclesia pro defunctis piè præscripsit.

Post hæc verò labente ferè sexennio, nempe die 25. Septembris 1710. auditis iterum dictorum Cardinalium, qui rem maturè, ac diligentissimè discusserunt, suffragiis, eadem responsa, necnon Mandatum, seu Decretum, quod illis expressè inhaerendo, à piæ recordationis Carolo Thoma, dum vixit, ejusdem Sanctæ Romanæ Ecclesiæ Cardinali de Tournon nuncupato, tunc Patriarcha Antiocheno, Commissario, & Visitatore Apostolico Generali in præfato Imperio Sinarum, die 25. Januarii 1707. editum fuit, ab omnibus, & singulis, ad quos spectabat, inconcussè, & inviolabiliter sub censuris, & penis in Mandato, seu Decreto hujusmodi expressis observanda esse decrevimus, & declaravimus, quovis contrafaciendi quasi colore, seu prætextu penitus sublato, ac potissimum non obstante quacumque appellatione à quibuscvis Personis ad Nos, & Sedem Apostolicam interposita, quam propterea prorsus rejiciendam esse similiter decrevimus, ac re ipsa rejecimus, prout in Decreto hac de re edito fusiùs continetur.

Hæc omnia plenè, & abundè sufficere debuissent, ut ea, quæ inimicus homo superseminaverat zizania, ex agro illo radicitiùs evellerentur, Fidelesque omnes nostris, & hujus Sanctæ Sedis mandatis ea, qua par erat, humilitate, & obedientia obsequerentur: præsertim, cum in calce responsorum prædictorum à Nobis, sicut præmittitur, confirmatorum, & approbatorum, Causam jam finitam esse apertis, & perspicuis verbis pronuntiatum fuerit.

Verùm, cum, sicuti ex eisdem partibus non sine intimo animi nostri dolore ad nostri pervenerit Apostolatus auditum, tam enixè à Nobis præscripta responsorum hujusmodi executio malè à plerisque, sive vano, falsoque obtentu, quòd illa à Nobis suspensa fuerint, vel minùs legitimè promulgata, sive conditionum, ut perperam asseritur, in eis insitarum, & ante executionem ipsam verificandarum, factorumve, super quibus ipsa emanarunt, non justificatorum ratione, sive ulteriorum à Nobis ea in re edendarum declarationum colore, sive gravium, quæ tam Missionariis, quàm Missionè ipsi ex demandata executione obvenire possent, periculorum formidine, sive demum Decreti dudum, nempe die 23. Martii 1656. super ejusmodi Ritibus, seu Cæremoniis Sinicis à præfata Congregatione Cardinalium editi, ac à recol. mem. Alexandro Papa VII. etiam Prædecessore nostro approbati prætextu, necnon sine gravi Pontificiæ nostræ auctoritatis injuria, Christi Fidelium scandalo, ac salutis animarum detrimento, satis diu, multumque eludatur, aut saltèm nimium retardetur.

Hinc est, quòd Nos, ex commissæ divinitus Apostolicæ servitutis munere, difficultates, tergiversationes, subterfugia, & prætextus hujusmodi penitus, & omnino è medio tollere, ac rejicere, necnon Christi Fidelium quieti, animarumque saluti, quantum Nobis ex alto conceditur, prospicere cupientes, de eorundem Cardinalium consilio, ac etiam motu proprio, & ex certa scientia, ac matura deliberatione nostris, deque Apostolicæ potestatis plenitudine, omnibus, & singulis Archiepiscopis, & Episcopis in supradicto Sinarum Imperio, aliisque ei conterminis, sive adjacentibus Regnis, ac Provinciis nunc, & pro tempore quodcumque existentibus, sub suspensionis ab exercitio Pontificalium, & Interdicti ab ingressu Ecclesiæ, eorum verò Officialibus, ac Vicariis in Spiritualibus Generalibus, aliisque illorum locorum Ordinariis, ac etiam Vicariis Apostolicis, qui Episcopi non sint, eorumve Pro-Vicariis, necnon Missionariis tam Secularibus, quàm cujusvis Ordinis, Congregationis, Instituti, & Societatis, etiam Jesu, Regularibus, sub excommunicationis late sententiæ, à qua nemo à quoquam, præterquam à Nobis, seu Romano Pontifice pro tempore existente, nisi in mortis articulo constitutus, absolvi possit, & quoad Regulares etiam privationis vocis activæ, & passivæ penis per contrafacientes ipso facto absque alia declaratione incurrendis, tenore præsentium præcipimus, ut in virtute sanctæ obedientiæ mandamus, ut responsa præferta, omniaque, & singula in eis contenta exactè, integrè, absolutè, inviolabiliter, & inconcussè observent; ac ab eis, quorum cura ad illos spectat, similiter observari, quantum in ipsis est, curent, & faciant: neque illis, sive ullo ex superius expressis, sive alio quovis titulo, causa, occasione, colore, vel prætextu contravenire quoquo modo audeant, vel præsumant.

Prætered motu, scientia, deliberatione, & potestatis plenitudine paribus, harum serie statuimus, & sub eisdem excommunicationis reservatæ, ac privationis vocis activæ, & passivæ penis ordinamus, ut omnes, & singuli Ecclesiastici tam Sæculares, quàm prædictorum Ordinum, Congregationum, Institutum, & Societatum, etiam



etiam Jesu, Regulares, ad Sinas, aliave præfata Regna, & Provincias, sive ab hac Sancta Sede, sive etiam ab eorum Superioribus missi, & quandocumque in posterum mittendi, cujusvis tandem tituli, aut facultatis vigore illic existant, vel in futurum extiterint, missi scilicet, statim ac præsentem Literam eis immotuerint; mittendi verò, antequam ibidem aliquod Missionarii munus exercere incipiant, Juramentum de fideliter, integrè, & inviolabiliter observando ejusmodi Præcepto, ac Mandato nostro, juxta formulam in præsentium Literarum calce annotandam, in manibus Commissarii, & Visitatoris Apostolici in præfato Imperio Sinarum pro tempore existentis, vel alterius ab illo deputati, sive, eo deficiente, in manibus Episcoporum, vel Vicariorum Apostolicorum dictarum partium, in quorum respectivè jurisdictione commorantur, vel commorabuntur, aut aliorum ab eis deputatorum; Regulares verò in manibus insuper Superiorum suæ Religionis, vel ab illis deputatorum in eisdem partibus existentium, præstare omnino debeant, ac teneantur: ita ut ante præstationem juramenti hujusmodi, & Subscriptionem sub eadem formula ab unoquoque, qui juramentum ipsum præstiterint, propria manu faciendam, nullum Missionarii munus continuare, aut exercere, immo nec tanquam deputati ab Episcopis, seu Ordinariis Locorum, aut tanquam simplices suæ Religionis Presbyteri, sive alio quovis titulo, causa, seu privilegio, de quibus expressa, specialis, & specialissima esset facienda mentio, Christi Fidelium confessiones audire, concionari, aut Sacramenta quomodolibet administrare ullo modo valeant, nullisque omnino facultatibus, sive sibi speciatim, sive suis respectivè Ordinibus, Congregationibus, Institutis, & Societatibus, etiam Jesu, hujusmodi generaliter à Sede præfata concessis uti possint, sed quoad eos, præter, & ultra superius expressas penas, omnes, & singula facultates prædictæ omnino cessent, nulliusque roboris sint, & esse censeantur.

Omnia autem Juramenta hujusmodi per quoscumque Missionarios tam Seculares, quam Regulares, in memoratorum sive Commissarii, & Visitatoris Apostolici pro tempore existentis, sive Episcoporum, aut Vicariorum Apostolicorum manibus, sicut præmittitur, præstanda, postquam Subscriptionem munita fuerint, vel saltem authentica illorum exempla per eosdem Commissarium, & Visitatorem Apostolicum pro tempore existentem, Episcopos, & Vicarios Apostolicos, ad præfata Congregationem Cardinalium, quanto citius fieri poterit, transmittantur.

Superiores verò Regulares cujusvis Ordinis, Congregationis, Instituti, & Societatis, etiam Jesu, illic nunc, & pro tempore existentes, sub eisdem penis teneantur non solum idem Juramentum in præfatorum sive Commissarii, & Visitatoris Apostolici pro tempore existentis, sive Episcoporum, aut Vicariorum Apostolicorum manibus, juxta modum suprà præscriptum, præstare, ejusque formulæ subscribere, sed etiam illius præstationem à suis respectivè Subditis exigere, ac authentica ea super re documenta quamprimum transmittere ad suos respectivè Superiores Generales, qui illa memorata Congregationi Cardinalium statim tradere debebunt.

Decernentes, eisdem præsentem Literas, & in eis contenta quacumque, etiam ex eo quod prædicti, & alii quicumque in præmissis interesse habentes, seu habere quomodolibet prætendentes, cujusvis status, gradus, Ordinis, præminentie, & dignitatis existant, seu aliàs specificas, & individua mentione, & expressione digni illis non consenserint, nec ad ea vocati, & auditi, causæque, propter quas præsentem emanarint, sufficienter adductæ, verificatæ, & justificatæ non fuerint, aut ex alia quolibet, etiam quantumvis juridica, & privilegiata causa, colore, prætextu, & capite, etiam in corpore Juris clauso, etiam enormis, enormissima, & totalis læsionis, nullo unquam tempore de subreptionis, vel obreptionis, aut nullitatis vicio, seu intentionis nostræ, vel interesse habentium consensus, aliore quolibet, etiam quantumvis magno, & substantiali, ac inexcogitato, & inexcogitabili, individuumque expressionem requirente defectu notari, impugnari, infringi, invalidari, retractari, in contrarium vocari, aut ad terminos Juris reduci, seu adversus illas aperationis Græ, restitutionis in integrum, aliudve quodcumque Juris, facti, vel gratiæ remedium intentari, vel impetrari, aut impetrato, seu etiam motu, scientia, & potestatis plenitudine paribus concessio, vel emanato, quempiam in judicio, vel extra illud, uti, seu se jurare ullo modo posse; sed ipsas præsentem Literas semper firmas, validas, & effectuales existere, & fore quibuscumque juris, seu facti defectibus, qui adversus illas, etiam quorumvis à Sede præfata concessorum privilegiorum prætextu, ad effectum im-



pediendi, seu retardandi earum executionem, quovis modo, seu quavis ex causa opponi, seu obijci possent, minimè refragantibus, suos plenarios, & integros effectus sortiri, & obtinere, easque propterea, omnibus, & singulis quomodolibet allatis, seu asserendis impedimentis penitus, & omnino rejectis, ac nequaquam attentis, ab illis, ad quos spectat, & pro tempore quandocumque spectabit, inviolabiliter, & inconcussè observari, sicque, & non aliter in præmissis per quoscumque Judices Ordinarios, & Delegatos, etiam Causarum Palatii Apostolici Auditores, ac ejusdem Sanctæ Romanæ Ecclesiæ Cardinales, etiam de Latere Legatos, & præfatæ Sedis Nuntios, aliosve quoslibet quacumque præminentia, & potestate fungentes, & functuros, sublata eis, & eorum cuiuslibet quavis aliter judicandi, & interpretandi facultate, & autoritate, judicari, & desiniri debere; ac irritum, & inane, si secus super his à quoquam quavis autoritate scienter, vel ignoranter contigerit attentari.

Non obstantibus præmissis, & quatenus opus sit, nostra, & Cancellariæ Apostolicæ Regula de Jure quasito non tollendo, aliisque Apostolicis, ac in Universalibus, Provincialibusque, & Synodalibus Conciliis editis generalibus, vel specialibus Constitutionibus, & Ordinationibus, necnon quorumcumque Ordinum, Congregationum, Institutum, & Societatum, etiam Jesu, ac quarumvis Ecclesiarum, & aliis quibuscumque, etiam juramento, confirmatione Apostolica, vel quavis firmitate alia roboratis Statutis, & consuetudinibus, ac præscriptionibus quantumcumque longissimis, & immemorabilibus, Privilegiis quoque, indultis, & Literis Apostolicis, Ordinibus, Congregationibus, Instituitis, & Societatibus, etiam Jesu, ac Ecclesiis prædictis, aliisve quibuscumque personis, etiam quantumvis sublimibus, & specialissima mentione dignis à Sede prædicta ex quacumque causa, etiam per viam contractus, & remunerationis, sub quibuscumque verborum tenoribus, & formis, ac cum quibusvis, etiam derogatoriæ derogatoriis, aliisque efficacioribus, efficacissimis, & insolitis clausulis, irritantibusque, & aliis decretis, etiam motu, scientia, & potestatis plenitudine similibus, seu ad quarumcumque personarum, etiam Imperiali, Regali, aliave quolibet mundana, vel Ecclesiastica dignitate fulgentium instantiam, aut earum contemplatione, seu aliis quomodolibet in contrarium præmissorum concessis, editis, factis, ac pluries iteratis, ac quantiscumque vicibus approbatis, confirmatis, & innovatis. Quibus omnibus, & singulis, etiam si pro illorum sufficienti derogatione de illis, eorumque totis tenoribus specialis, specifica, expressa, & individua, ac de verbo ad verbum; non autem per clausulas generales idem importantes, mentio, seu quævis alia expressio habenda, aut aliqua alia exquisita forma ad hoc servanda foret, tenores hujusmodi, ac si de verbo ad verbum, nihil penitus omisso, & forma in illis tradita observata, exprimerentur, & infererentur, præsentibus pro plenè, & sufficienter expressis, & insertis habentes, illis aliis in suo robore permansuris, ad præmissorum effectum hac vice duntaxat specialiter, & expressè derogamus, & derogatum esse volumus, ceterisque contrariis quibuscumque.

Formula autem Juramenti, sicut præmittitur, præstandi est, quæ sequitur, videlicet: Ego N. Missionarius ad Sinas, vel ad Regnum N. vel ad Provinciam N. à Sede Apostolica, vel à Superioribus meis, juxta facultates eis à Sede Apostolica concessas, missus, vel destinatus, Præcepto, ac Mandato Apostolico super Ritibus, & Cæremoniis Sinensibus in Constitutione Sanctissimi Domini Nostri Domini Clementis, Divina Providentia Papæ XI. hac de re edita, qua præsentis Juramenti formula præscripra est, contento, ac mihi per integram ejusdem Constitutionis lecturam optimè noto, plenè, ac fideliter parebo, illudque exactè, absolutè, ac inviolabiliter observabo, & absque ulla tergiversatione adimplebo. Si autem (quod Deus avertat) quoquo modo contravererim, toties quoties id evenerit, poenis per prædictam Constitutionem impositis me subiectum agnosco, & declaro. Ita tactis Sacrosanctis Evangeliiis promitto, voveo, & juro. Sic me Deus adjuvet, & hæc Sancta Dei Evangelia.

Ego N. manu propria.

Ceterum volumus, & expressè mandamus, ut eadem præsentis Literæ, seu earum exempla, etiam impressa, notificentur, & intimentur omnibus, & singulis memoratorum Ordinum, Congregationum, Institutum, & Societatum, etiam Jesu, Superioribus Generalibus, & Procuratoribus Generalibus, ad hoc, ut tam suo, quam prædictorum eis respectivè  
Subdi-

*Subditorum, seu inferiorum nomine, ipsas Literas fideliter exequi, & observare spondeant, actumque sponsonis hujusmodi in scriptis reddant; earum verò exempla prædicta pluribus viis, quanto citius fieri poterit, transmittant ad eosdem suos Subditos, seu inferiores in Sinis, aliisque Regnis, & Provinciis supradictis degentes, cum artissimis præceptis eadem Literas, & in eis contenta quæcumque plenariè, & integrè, ac verè, realiter, & cum effectu in omnibus, & per omnia similiter exequendi, & observandi. Quia verò difficile foret, Literas hujusmodi originales ubique ostendi, & publicari, volumus pariter, & decernimus, illarum transumptis, seu exemplis, etiam impressis, manu alicujus Notarii publici subscriptis, & sigillo Personæ in Ecclesiastica dignitate constitutæ munitis, eandem prorsus fidem tam in judicio, quàm extra illud, ubique locorum haberi, quæ haberetur ipsis presentibus, si forent exhibitæ, vel ostensæ. Datum Romæ apud Sanctam Mariam Majorem sub Annulo Piscatoris die 19. Martii 1715. Pontificatus nostri anno decimoquinto.*

*F. Oliverius.*

Per Constitutionem Apostolicam adeò solemnem, qua Clemens Papa XI. se huic controversiæ finem dedisse testatur, justum, & æquum videbatur, eos, qui Sanctæ Sedis auctoritatem sese quàm maximè revereri profiterentur, humili, & obsequenti animo illius judicio semet omnino subicere, nec ulterius quicquam cavillari. Nihilominus inobedientes, & captiosi homines exactam ejusdem Constitutionis observantiam se effugere posse putarunt, ea ratione, quòd illa Præcepti titulum præfert, quasi verò non indissolubilis Legis, sed Præcepti merè Ecclesiastici vim haberet; tum etiam quòd illam debilitatam existimarent ex Permissionibus quibusdam, quas super iisdem Sinenfibus Ritibus publicavit Carolus Ambrosius Mediobarbus, Patriarcha Alexandrinus, cùm Commissarium, & Visitatorem Generalem Apostolicum in iis Regionibus ageret.

Nos igitur animadvertentes, prædictam Constitutionem Christiani Cultus puritatem respicere, quem illa ab omni superstitionis labe immunem servare contendit, nullo modo ferre possumus, quemquam existere, qui eidem repugnare temerè audeat, aut contemnere, perinde ac ipsa Supremam Apostolicæ Sedis decisionem non contineret, & id, quo de agitur, non ad Religionem spectaret, sed quid per se indifferens foret, aut quædam variabilis disciplinæ ratio. Proinde auctoritate ab Omnipotenti Deo Nobis tradita uti volentes, ad illam in suo robore omnino servandam; de auctoritatis ejusdem plenitudine non modò eam approbamus, & confirmamus, sed etiam, quantum possumus, omnem vim, & firmitatem, ad illam magis, magisque roborandam, ac stabiliendam, adjicimus, eamque in se plenam, & omnimodam Apostolicæ Constitutionis auctoritatem habere dicimus, & declaramus.

Permissiones autem, quarum obtentu aliqui prædictæ Constitutionis robur infringere conantur, originem duxerunt à responsionibus quibusdam, quas duo viri, qui jampridem in Sinarum Regno fuerant, ad quæsitam nonnulla dederunt, quæ super ejusdem Constitutionis Apostolicæ executione, ac praxi Missionarii quidam proposuerant. Responsiones itaque hujusmodi unâ cum dubiis illis, nullo tamen Romani Pontificis sive approbantis, sive aliquid de suo addentis indicio, transmissæ fuerunt ad præfatum Patriarcham Alexandrinum, ejus animi instruendi causa, utque illis uteretur, prout circumstantiæ rerum, ac temporis postularent; integro tamén remanente Apostolicæ Sedis Jure eas comprobandi, vel etiam revocandi, si quando conformes, aut repugnantes Constitutionis præfatæ decretis ullo modo compertæ forent.

Vix Sinarum Regnum Patriarcha Alexandrinus ingressus, in iis angustiis se positum intellexit, ut coactus fuerit in publicum emittere, non quidem responsiones, quas præmemorati duo viri ad proposita quæsitæ dederant, bene verò Permissiones octo, quæ ab illis fuerant deductæ, atque inde ab eodem Patriarcha in Pastoralis sua Epistola insertæ, cujus tenor est, ut sequitur:



*Carolus Ambrosius Medio barbarus, Dei, & Apostolicæ Sedis gratia Patriarcha Alexandrinus, necnon in Indiis Orientalibus, ac Sinarum Imperio, finitimisque Regnis, & Insulis Commissarius, & Visitator Generalis Apostolicus cum facultate Legati de Latere, &c.*

*Omnibus Episcopis, Vicariis Apostolicis, ac Missionariis, qui in prædictis partibus degunt, salutem in eo, qui est omnium vera salus.*

Benedictus Deus, & Pater Domini nostri Jesu-Christi, Pater misericordiarum, & Deus totius consolationis, qui consolatur nos in omni tribulatione nostra, ut possimus & ipsi consolari eos, qui in omni pressura sunt, per exhortationem, qua exhortamur & ipsi à Deo. Nil etenim Nobis magis in animo fuit, ex quo in Sinarum Imperium, Deo favente, pervenimus, quam cum iis omnibus, qui in hac Evangelica Vineâ laborant, os ad os loqui. Desideravimus enim videre vos, ut aliquid impertiremur vobis gratiæ spiritualis ad confirmandum vos, id est, simul consolari in vobis per eam, quæ in invicem est, fidem vestram, atque meam. Verum, quia non sapientiam hujus sæculi loquuti fuimus, in timore, & tremore multo fuimus apud vos, satiusque duximus, ad sedandam tempestatem adversus Evangelicos Operarios ingruentem, Nos in mare projicere, ut vos jactari sinatis. Adjutor noster nunc & erit ille Deus, qui dedit Nobis in mari viam, & in aquis torrentibus semitam. Veritatem dicimus in Christo, non mentimur, testimonium Nobis perhibente conscientia nostra in Spiritu Sancto; quoniam tristitia Nobis magna est, & continuus dolor adhaeret cordi nostro, quòd præsentem non potuerimus solari vos, ut fructum aliquem haberemus, & in vobis, & in cæteris gentibus. At verò, quod non licuit per præsentiam agere, saltem per epistolam non impedimur. Primum quidem gratias agimus Deo nostro per Jesum-Christum pro omnibus vobis, qui Spiritu Sancto ferventes, & fortes, Sanctæ Sedis mandatis rationabile exhibetis ministerium vestrum, jactantes cogitatum in eum, cui à Domino dictum est: Pasce oves meas: Cui tradite sunt claves domus David: Si aperit, non est, qui claudat; si claudat, non est, qui aperiat. Quotquot esis. mattæ animis, vigilate, state in fide, viriliter agite, & confortamini, quia merces vestra magna est in Cælis. Ministerium vestrum implete, attendite vobis, & doctrinæ. Lucernæ estote, non minus lucentes exemplo, ac zelo prædicationis ardentes. Si qui verò adhuc essent hæsitantes, & in opere non efficaces, obsecramus vos, Fratres, per nomen Domini nostri Jesu-Christi, ut idipsum dicatis omnes, & non sint in vobis Schismata, sitis perfecti in eodem sensu, & in eadem sententia. Non amplius invicem judicemus. Unusquisque vestrum pari humilitate ac obedientia Sanctæ Sedis mandatis obsequatur, ut vestra obedientia in omnem locum divulgetur. Non enim opus est, ut aliquem actum faciamus, ut Sanctissimi Domini Nostri Clementis Papæ XI. mandata jam promulgata vobis innotescant, vimque habeant, ut absque ulla tergiversatione executioni mandentur. Nihil proinde innovamus; sed relinquimus res, prout sunt: hoc est, nullatenus Constitutionem super Ritibus Sinicis à Sanctissimo Domino Nostro Clemente Papa XI. die 19. Martii 1715. emanatam suspendimus, aut, quæ in ea continentur, permittimus. Ob aliqua tamen quibusdam Missionariis circa quasdam Cæremonias peragi consuetas suborta dubia, ut quilibet in Vineâ Domini strenuè, ac viriliter laborare queat, nonnulla adnotamus, quæ permitti poterunt, quæ, & separatim unicuique secundum quæsitâ dedissemus, nisi compertum Nobis esset, unâ cum incertis nuntiis jam disseminata proborum animos, & Christi Fideles bonæ voluntatis non parum perturbasse. Omni igitur, quo poteritis, studio, ac diligentia curare debetis, ut gentium Cæremoniis penitus sublati, illi sensim à Christianis, & pro Christianis usu recipiantur Ritus, quos Catholica Ecclesia piè præscripsit.

*Primo.* Permittitur Christianis Sinenfibus in suis privatis domibus uti Tabellis defunctorum, inscriptis solo nomine defuncti, apposita ad latus declaratione debita, & omiſsa quacumque superstitione in earum constructione, necnon secluso omni scandalo. *Secundo.* Permittuntur omnes Cæremoniæ Nationis Sinicæ erga defunctos, quæ non sint, aut superstitiosæ, aut suspectæ; sed civiles. *Tertio.* Permittitur Confucii cultus ille, qui civilis est, & etiam ejusdem Tabellæ purgatæ, & literis, & superstitiosa inscriptione, & adjuncta declaratione debita, sicuti permittitur ante ejus Tabellam correctam accendi cendelas, uri odores, apponi comestibilia, &c. *Quarto.* Permittitur pro usu, & expensis

fu.



funerum offerri candelas, odores, adjuncta in schedula debita declaratione. *Quintò*. Permittuntur reverentiæ genuflexionum, & prostrationum erga Tabellam correctam, aut etiam, erga feretrum, aut defunctum. *Sextò*. Permittitur preparari mensas cum dulciariis, fructibus, carne, & cibis usualibus circa, aut coram feretro, ubi sit Tabella correctæ, cum debita declaratione, & omisissis superstitiosis, pro quadam honestate tantum, & pietate erga defunctos. *Septimò*. Permittitur coram Tabella correctæ reverentia dicta *Koretum* in anno novo Sinico, tum in aliis anni temporibus. *Ottavò*. Permittitur coram Tabellis reformatis accendi candelas, uri odores cum debitis cautelis, sicuti etiam ante tumulum, ubi pariter collocari possunt cibi, ut supra dictum est, adhibitis cautelis, ut in superioribus. *Apostolici* ergo viri Ecclesiam adhibentes non habentem maculam, neque rugam, ponant manum suam ad aratrum, nec respiciant retrò. Videte, fratres, vocationem vestram; non enim auditores Legis iusti sunt apud Deum; sed factores Legis iustificabuntur. Obscuramus itaque vos, ut dignè ambuletis vocatione, qua vocati estis, scilicet servare unitatem Spiritus in vinculo pacis. Nè diutius agamus secundum potestatem, paternè vos commone volumus per epistolam. Amabilem illum Patrem familias, qui exiit otiosi? Ite & vos in Vincam meam. Vocem Patris perpendite, & illam Iudicis timete. Ipsi vos probate; virtus enim Dei erit vobis in auxilium, ac plenam ministerio Verbi Dei sancti recipietis mercedem, immarcescibilem nimirum à Pastorum Principe gloria coronam. Nè quis vos seducat inanibus verbis obedire veritati. Scitote, quod obedientes voci ejus, qui misit vos, rationem non eritis reddituri pro animabus, sed unusquisque vestrum pro se rationem reddet Deo. Quicumque sub diversis prætextibus cessandum sibi putat à ministerio Missionarii, ledit animam suam, & de alienis æterno Judici rationem reddet. Quam dabit homo commutationem pro anima sua, & pro alienis? Deus est vitis vera, vos palmites. Qui non ferent fructus in eum, arescent tanquam palmites; & collecti, & alligati in fasciculos ad comburendum mittentur in caminum ignis inextinguibilis. Respicite Dominum nostrum Jesum. Christum secum viam ambulantes, qui in fici arbore nihil invenit, nisi folia tantum, & ait illi: Numquàm ex te nascentur fructus in sempiternum. Si aliqui palmites jamdiu conversi in amaritudinem, qui expectabantur, ut tandem facerent uvas, spinas super spinas adjecissent, vob, vob à die iræ, à die furoris, & indignationis Domini! Attendite ad verba, quæ mandat vobis per Servum suum Dominus adhuc misericors. Revertimini ad Deum vestrum, manete in eo, qui manens in vobis purgabit vos, & desideratos cunctis Gentibus fructus afferetis. Apostolico satisfecisse nos muneri judicamus; non enim subterfugimus, quominus annuntiaremus omne consilium Dei vobis, ut nullam excusationem habeatis de peccatis vestris. De cætero quotquot eritis obedientes, fratres, gaudeate, perfecti estote, exhortamini, idem sapite, pacem habete; & Deus pacis, & dilectionis erit vobiscum.

Cum verò ad promovendam in Neophitis debitam Decretis Apostolicis obedientiam, præsentium nostrarum Literarum notitiam iisdem Neophitis minime necessariam esse, sed satis esse eos in viam salutis dirigere juxta Pontificiæ Constitutionis præscripta, compertum sit, nè quis eorum, ad quos præsentis Literæ directæ sunt, cujuscunque Ordinis, aut Instituti, aut Congregationis fuerit, aut Societatis etiam Jesu, præsentis Literas, aut quæ in eis continentur (exceptis Permissionibus, quæ quidem cautè, & ubi necessitas tantum, aut utilitas postulaverit, patefaciendæ erunt) sive directè, sive indirectè per se, vel per alium voce tenuis, aut scripto in Linguam Tartaram, aut Sinicam vertat, aut quocunque modo cuilibet, qui Missionarius non sit, nota faciat, sub excommunicationis lætæ sententiæ, à qua non nisi à Nobis, aut à Summo Pontifice (præterquam in articulo mortis constitutus) absolvi possit, & quoad Regulares etiam privationis vocis activæ, & passivæ penis per Contrafacientes ipso facto absque alia declaratione incurrendis tenore præsentium vetamus, & in virtute sanctæ obedientiæ prohibemus. Datum Macai in Palatio nostræ Residentiæ die 4. Novembris anno 1721.

Cum autem Patriarcha Alexandrinus in præallata Pastoralis mentem suam satis prudenter explicasset, nimirum Pastoralis hujus suæ Epistolæ notitia opus non esse ad promovendam in Neophitis erga Pontificiæ Decreta venerationem, & observantiam, cum satis esset, ut juxta Constitutionis Pontificiæ mandata in

via salutis dirigerentur, præterea cum omnibus, & quibuscumque interdictum voluisset, sub poena quodque excommunicationis latae sententiae, nè quis illam in Sinensem, aut in Tartaricum sermonem verteret, aut cuiquam, qui Missionarius non esset, eam palam faceret; de Permissionibus autem cum statuisset, non nisi cautè, & ubi tantum utilitas, vel necessitas id postularet, esse evulgandas: profectò omnis, ad quem Pastoralis illa dirigebatur, ex tali procedendi modo haud obscure inferre debebat, quantis ille animi angustiis obsessus, & quam anceps, ac perplexus in Permissionibus huiusmodi proponendis extitisset; adeò ut oeconomia quadam usus fuisset ad loci, & temporis circumstantias prorsus necessaria: à qua putandum est eum recessurum fuisse, si libertas sibi data esset rem discutiendi cum Episcopis, aliisque doctis Viris, qui nihil aliud, quàm Christiani cultus puritatem, & Apostolicæ Constitutionis observantiam ante oculos haberent. At Permissiones illæ contra expressam adeò Patriarchæ ipsius voluntatem evulgatae; & quod mirum, Pekini Episcopus per binas suas Pastorales mandavit, sub poena suspensionis ipso facto incurrendæ, universis Diocesis suæ Missionariis, ut observarent, & observari præciperent Constitutionem: *Ex illa die*, juxta Permissiones, quas ipse contendebat, ad ea potissimum referri, quæ in præcitata Constitutione fuerant solemniter interdicta. Præcepit insuper, ut Christi Fideles quater, singulis annis in diebus omnium celeberrimis, distinctè instruerentur, cum in iis, quæ Constitutione Apostolica prohibentur, tum in iis, quæ à Patriarchæ Alexandrini Pastoralis permittuntur.

Enimverò Clemens Papa XII. Prædecessor noster tam audax Episcopi Pekinensis factum æquo animo ferre haud potens, muneris suo maximè interesse judicavit binas illas Epistolas damnare, ac penitus reprobare Apostolico Brevi, quod anno 1735. promulgavit: in quo sibi, ac Sanctæ Sedi facultatem reservavit declarandi Sinenfibus Christianis mentem suam, & ejusdem Sanctæ Sedis sententiam in iis, aliisque, quæ ad materiam huiusmodi spectarent. Præfatum autem Breve est tenoris sequentis:

### CLEMENTIS PAPÆ XII.

*Revocatio, annullatio, & cassatio duarum Epistolarum Pastoralium bon. mem. Francisci Episcopi Pekinensis. nuper defuncti, die vj. Julii, & die xxij. Decembris MDCCXXXIII. circa Ritus Sinenfes editarum.*

### CLEMENS PAPA XII.

*Ad perpetuam rei memoriam.*

*Apostolicæ sollicitudinis Nobis divinitus commissæ ratio Nos admonet, ut ea, quæ Christianæ Religionis, Catholicæque Fidei propagationi, ac incrementis quacumque ratione obfistere posse dignoscuntur, quantum Nobis ex alto conceditur, recidere, ac è medio tollere studeamus. Cum itaque, sicut ad Apostolatus nostri notitiam pervenit, occasione binarum Epistolarum, quas Pastorales vocant, bon. mem. Francisci, dum viveret, Episcopi Pekinensis. nuper defuncti, die 6. Julii, & 23. Decembris anni 1733. circa Ritus Sinenfes editarum, graves in Imperio Sinarum inter Apostolicos illarum partium Missionarios exortæ fuerint dissensiones, quæ uberes fructus, quos Sancta Mater Ecclesia ex assiduo Operariorum in illam Agri Dominici partem missorum labore præstolatur, impedire, aut morari possent; Nos, ut pristina inter eos Missionarios pax, & animorum concordia, sublati quibuscvis dissidiis, resituatur, de opportuno in præmissis remedio providere volentes, ac Epistolarum prædictarum tenores, & alia quæcumque etiam specificam, & individuum mentionem, & expressionem requirerentia, præsentibus pro plenè, & sufficienter expressis, & exactè specificatis habentes, de nonnullorum Venerabilium Fratrum nostrorum S. R. E. Cardinalium, qui jussu nostro Epistolas ipsas sedulo, ac diligenter examinarunt, consilio, ac etiam motu proprio, & ex certa scientia, & matura deliberatione nostris, deque Apostolica potestatis plenitudine binas memorati Francisci Episcopi Pekinensis. Epistolas Pastorales præfatas, ac pœnas, & alia quæcumque in eis contenta, cum omnibus, & singulis inde secutis, & forsàn quandocumque secuturis, penitus, & omnino nulla, invalida, & irrita, nulliusque prorsus roboris, & momenti esse, & perpetuò fore, tenore præsentium declaramus:*



ramus: & nihilominus ad majorem cautelam; & quatenus opus, illa omnia, & singula motu, scientia, deliberatione, & potestatis plenitudine paribus harum serie itidem perpetuò revocamus, cassamus, irritamus, annullamus, & abolemus, viribusque, & effectibus penitus, & omnino vacuumus, ac pro revocatis, cassatis, irritis, nullis, invalidis, & aboliitis, viribusque, & effectu penitus, & omnino vacuis semper haberi volumus: Nobis in super, & Apostolica Sedi reservantes facultatem Christi Fidelibus in eodem Regno non degentibus aperiendi nostram, & dictæ Sedis mentem post maturam itidem habitam deliberationem super aliis rebus, quæ hujusmodi materiam respiciunt: Decernentes ipsas præsentis Literas semper firmas, validas, & efficaces existere, & fore, suosque plenarios, & integros effectus sortiri, & obtinere, & ab omnibus, & singulis, ad quos quomodolibet spectat, & pro tempore quandocumque spectabit, præsertim verò Archiepiscopis, Episcopis, Vicariis, Pro-Vicariis, & Missionariis Apostolicis tam Secularibus, quam cujusvis Ordinis, Congregationis, Instituti, & Societatis etiam Jesu, Regularibus in supradicto Sinarum Regno, nunc, & pro tempore existentibus, inviolabiliter, & inconcussè observari, sicque, & non aliter in præmissis per quoscumque Judices Ordinarios, & Delegatos, etiam Causarum Palatii Apostolici Auditores, ac ejusdem S. R. E. Cardinales, etiam de latere Legatos, & Sedis præfatæ Nuncios, aliosque quoslibet quacumque præminentia, & potestate fungentes, & functuros, sublata eis, & eorum cuilibet quavis aliter judicandi, & interpretandi facultate, & auctoritate, judicari, & definiri debere, ac irritum, & inane, si secus super his à quoquam quavis auctoritate scienter, vel ignoranter contigerit attentari: In contrarium facientibus non obstantibus quibuscumque. Volumus autem, ut earundem præsentium Literarum transumptis, seu exemplis, etiam impressis, manu alicujus Notarii publici subscriptis, & sigillo Personæ in Ecclesiastica dignitate constitutæ munitis, eadem prorsus fides in Judicio, & extra adhibeatur, quæ præsentibus ipsis adhiberetur, si forent exhibita, vel ostensa. Datum Romæ apud Sanctam Mariam Majorem sub Annulo Piscatoris die 26. Septembris 1735. Pontificatus nostri anno sexto.

*F. Card. Oliverius.*

Id verò, quod idem Pontifex Clemens XII. sibi, ac Sanctæ Sedi Christianis Sinensibus declarandum reservavit, erat profectò materia Permissionum, de quibus certior jam factus fuerat, deque maxima inde secuta inter Missionarios dissensione: cum alii contenderent, Constitutionem: *Ex illa die*: omnem vim suam amittere, si Permissiones illæ in praxi consistant; alii verò factis palam ostenderent, Permissionum colore se ad prædictæ Constitutionis observantiam minime teneri, juxta illa, quæ in ipsa Constitutione præscribuntur: Itaque præfatus Prædecessor noster, quò Christianæ Religionis puritatem, quæ in iis Regionibus per exactam præmemoratæ Constitutionis observantiam servanda erat, assereret, & controversiis istiusmodi finem aliquando imponeret, examini perquam diligenti totum Permissionum negotium commisit, ita ut à Theologis, tum etiam à Sanctæ Romanæ Ecclesiæ Cardinalibus, Sacræ Inquisitioni Præpositis, maturè, seriòque discuteretur. Antequam verò supremam de illis sententiam pronuntiaret, ad plenioris facti notitiam obtinendam, omnes, & singulos, quotquot in Urbe existerent, Sinarum Missionarios, tum etiam complures Juvenes, qui ex iis Regionibus in Europam, educationis, & Christianæ rei addiscendæ causa, venerant, ad examen super his, servato juris ordine, vocari jussit.

Nos igitur Prædecessoris nostri vestigiis insistentes, eodemque Religionis zelo, quo ille, incensi, ut tanti momenti opus, quod ipse morte præoccupatus absolvere minime potuit; aliquando tandem, Deo auxiliante, perficeremus, Permissiones illas, & quidem singulas, coram Nobis summo studio, ac diligentia examinari curavimus: neque laborem nostrum tantum; sed Cardinalium quòque, & Sacræ Inquisitionis Consultorum doctrinam, & consilium exquisivimus, ac tandem satis apertè compertum habemus, antedictas Permissiones nunquam à Sancta Sede probatas, Apostolicæ Clementis Papæ XI. Constitutioni repugnare, atque adversari, utpotè quæ partim Cæremonias, Ritusque Sinenses à prædicta Constitutione scriptos admittant, ac veluti probatos, atque utendos concedant: partim regulis in ipsa traditis ad vitandum superstitionis periculum opponantur.



Nolentes itaque, quemquam ad Constitutionem ipsam summo Christianæ Religionis damno malitiosè evertendam Permissionibus ejusmodi uti, definimus, ac declaramus, præfatas Permissiones ita esse habendas, ac si nunquam extitissent, earumque praxim tamquàm superstitiosam omnino damnamus, & execramur. Itaque præsentis hujus nostræ Constitutionis perpetuò valituræ vi revocamus, rescindimus, abrogamus, atque omni vigore, & effectu vacuas esse volumus omnes illas, & singulas permissiones; easque semper uti caslas, irritas, invalidas, & nullius prorsus roboris, aut vigoris habendas esse dicimus, ac pronunciamus.

Præterea cùm Clemens Papa XI. in Constitutione: *Ex illa die*: apposuerit hæc verba = *Per præmissa nihilominus non vetari, quominus erga defunctos peragi possint alia, si quæ sint, quæ verè superstitiosa non sint, &c.* = Nos dicimus, & declaramus ea verba: = *Alia, si quæ sint* = intelligenda esse de usibus, & Cæremoniis diversis ab illis, quas idem Pontifex Apostolica Constitutione jam interdixerat, & quas Nos pariter eadem autoritate configimus, atque interdici-mus, nè antedictis Permissionibus, quas omnino damnatas volumus, ullus in posterum locus pateat.

Distictè itaque prohibemus, nè quis Archiepiscopus, aut Episcopus, aut Vicarius, aut Delegatus Apostolicus, aut Missionarius tam Sæcularis, quàm Regularis, cujuscumque Ordinis, Congregationis, Instituti, etiam Societatis Jesu, aliorumque, de quibus expressa, & individua mentio fieri debeat, Permissionibus prædictis ullo pacto uti valeat, sive publicè, sive privatim, sive palàm, sive clam; neque audeat, vel præsumat Constitutionis paulò ante citata verba aliter, ac Nos suprà declaravimus, alicui explicare, aut interpretari. Quare ex prædictorum Sanctæ Romanæ Ecclesiæ Cardinalium consilio, motu quòque proprio, ac certa scientia, maturaque deliberatione, tum etiam de plenitudine Apostolicæ potestatis, Constitutionis præsentis tenore, & in virtute sanctæ obedientiæ præcipimus, & expressè mandamus omnibus, & singulis Archiepiscopis, & Episcopis, in Sinarum Imperio, aliisque Regnis, & Provinciis, sive finitimis, sive adjacentibus, nunc existentibus, aut olim pro tempore futuris, sub poenis suspensionis à Pontificalium exercitio, & ab Ecclesiæ ingressu Interdicti, eorum verò Officialibus, & Vicariis in Spiritualibus Generalibus, aliisque eorumdem Locorum Ordinariis, Vicariis quòque, aut Delegatis Apostolicis, qui Episcopi non sunt, tum etiam eorum Provicariis, & insuper Missionariis universis tam Sæcularibus, quàm Regularibus cujuscumque Ordinis, Congregationis, Instituti, etiam Societatis Jesu, sub poenis privationis quarumcumque, quibus gaudent, facultatum, & suspensionis ab exercitio curæ animarum, tum etiam suspensionis à Divinis ipso facto incurrendæ absque alia declaratione, demum excommunicationis latæ sententiæ, à qua non possint, nisi à Nobis, & à Romano Pontifice pro tempore existente absolvi, præterquam in articulo mortis constituti, addita quoad Regulares etiam vocis activæ, & passivæ privationis poena, præcipimus, & distictè mandamus, ut omnia, & singula, quæ in hac nostrâ Constitutione continentur, exactè, integrè, absolutè, inviolabiliter, atque immobiliter, non modò ipsi observent; sed etiam omni conatu, ac studio ea ipsa observari curent à singulis, & universis, qui quoquo modo ad eorum curam, & regimen spectant; nec colore, causa, occasione, seu prætextu aliquo huic nostræ Constitutioni ulla in parte contraire, aut adversari audeant, vel præsumant. Præterea quoad Missionarios Regulares cujuscumque Ordinis, Congregationis, Instituti, ac Societatis quòque Jesu, si quis eorum (quod Deus avertat) exactam, integram, absolutam, inviolabilem, strictamque obedientiam denegaverit iis, quæ à Nobis præsentis hujus Constitutionis tenore statuuntur, ac præcipiuntur; eorum Superioribus tam Provincialibus, quàm Generalibus in virtute sanctæ obedientiæ expressè mandamus, ut homines hujusmodi contumaces, perditos, ac refractarios à Missionibus absque ulla mora dimoveant, eosque in Europam statim revocent, ac de illis notitiam Nobis exhibeant, ut reos pro gravitate criminis punire valeamus. Quòd si prædicti Superiores Provinciales, aut Generales huic nostro præcepto minùs obtemperaverint, aut in eo desides fuerint;

Nos contra ipsos quòque procedere non recusabimus, atque inter cetera mittendi aliquem ex ipsorum Ordine in earum Regionum Missiones privilegio, seu facultate eos perpetuò privabimus.

Postremò, ut hæc nostra Constitutio in suo robore semper integra, ac firma maneat, volumus quòque, ut ad Formulam Juramenti, à Clemente Papa XI. in sua Constitutione præscriptam, nonnulla adjiciantur, quæ maximè necessaria putavimus. Idcirco omnes, qui præfata Constitutionis vigore sub penis in ea contentis Juramentum præstare debebunt, in posterum sequenti formula utentur, videlicet: *Ego N. Missionarius ad Sinas, vel ad Regnum N. vel ad Provinciam N. à Sede Apostolica, vel à Superioribus meis, juxta facultates eis à Sede Apostolica concessas, missus, vel destinatus, Precepto, ac Mandato Apostolico super Ritibus, ac Ceremoniis Sinensibus, in Constitutione Clementis Papæ XI. hæc de re edita, quæ præsentis Juramenti formula præscripta est, contento, ac mihi per integrum ejusdem Constitutionis lecturam apprime noto, plenè, ac fideliter parebo, illudque exactè, absolutè, ac inviolabiliter observabo, & absque ulla tergiversatione adimplebo, atque pro virili enitar, ut à Christianis Sinensibus, quorum spiritualem directionem quos quo modo me habere contigerit, similis obedientia eidem præstetur. Ac insuper, quantum in me est, nunquam patiar, ut Ritus, & Cereemonie Sinenses in Literis Pastoralibus Patriarchæ Alexandrini Macai, datis die 4. Novembris 1721. permixta, ac à Sanctissimo Domino Nostro BENEDICTO PAPA XIV. damnate, ab eisdem Christianis ad proximum deducantur. Si autem (quod Deus avertat) quoquo modo contravenerim, toties, quoties id evenierit, penis per prædictas Constitutiones impositis me subiectum agnosco, & declaro. Ita tantis Sacrosanctis Evangeliiis promitto, voveo, & juro. Sic me Deus adjuvet, & hæc Sancta Dei Evangelia.*

*Ego N. manu propria.*

Confidimus igitur fore, ut Princeps Pastorum Jesus Christus laboribus à nobis, qui ejus vices in terris gerimus, in hoc gravissimo negotio diu impensis benedicat, ut in amplissimis illis Regionibus Evangelica lux, clarè, nitidèque effulgeat, ac præpotenti manu sua sic pia nostra consilia promoveat, ut Regionum earundem Pastores intelligant, planèque sibi persuadeant obligationem, qua ipsi tenentur vocem nostram audire, & sequi. Confidimus quòque, Deo favente, ex eorum cordibus inane illud merum sublatum iri, nè videlicet per exactam Pontificiorum Decretorum observantiam Infidelium conversio retardetur. Nam hæc à Divina Gratia sperari potissimum debet, quæ quidem ab eorum ministerio longe non aberit, si Christianæ Religionis veritatem impavidè prædicaverint, atque ea puritate, quæ ipsi ab Apostolica hac Sancta Sede tradita est, parati quòque ad eam propugnam sanguinem effundere, exemplo Sanctorum Apostolorum, aliquumque Christianæ Fidei Clarissimorum Propugnatorum, quorum sanguis tantum absuit, ut Evangelii cursum interciperet, aut retardaret, ut potius Vineam Domini florentem magis, & Fidelium animarum copiosiore effecerit. Nos quidem pro viribus nostris Deum obsecrabimus, ut invictam illis hanc animi firmitatem, & Apostolici zeli robur concedat. Verùm ad eorum memoriam deducimus, ut, quando ad Sacras Missiones destinantur, se tamquam veros Jesu Christi discipulos cogitent, & ab eodem se missos fuisse: non ad gaudia temporalia; sed ad magna certamina: non ad honores; sed ad despectiones: non ad otium; sed ad labores: non ad requiem; sed ad asserendum fructum multum in patientia.

Volumus autem, ut earundem præsentium transumptis, etiam impressis, manu alicujus Notarii publici subscriptis, & sigillo Personæ in Dignitate Ecclesiastica constitutæ munitis, eadem fides prorsus adhibeatur, quæ ipsis originalibus Literis adhiberetur, si forent exhibitæ, vel ostensæ.

Nulli ergo hominum liceat hanc paginam nostræ confirmationis, innovationis, revocationis, rescissionis, abolitionis, cassationis, annulationis, damnationis, ac ordinationis infringere, vel ei ausu temerari



merario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli, Apostolorum ejus, se noverit incursum. Datum Romæ apud Sanctam Mariam Majori quinto Idus Julii anno Incarnationis Dominicæ millesimo septingentesimo quadragesimo secundo, Pontificatus nostri anno secundo. P. Card. Pro-Datar. D. Card. Pafsioneus. Vifa de Curia N. Antonellus. J. B. Eugenius. Registrata in Secretaria Brevium.

Anno à Nativitate Domini Nostri JESU-CHRISTI millesimo septingentesimo quadragesimo secundo, indictione quinta; die verò nona Augusti, Pontificatus autem Sanctissimi in Christo Patris, & Domini Nostri Domini BENEDICTI, Divina Providentia PAPÆ XIV. Anno secundo, supradicta Constitutio affixa, & publicata fuit ad valvas Basilicæ Lateranensis, & Principis Apostolorum, & Cancellariæ Apostolicæ, Curie Generalis in Monte Citorio, & in Acie Campi Floræ, ac in aliis locis solitis, & consuetis Urbis, per me Sebastianum Amadeum, Apost. Curf.

Nicolaus Capelli Mag. Curf.

Petrus de Propertiis, olim Cantarell. Cur. Capitol.

Notarius.

Loco ✠ Sigilli.

Concordat hoc Exemplar cum Literis Apostolicis in formam transumpti redactis, publicatis, & affixis, ut supra, mihi infra scripto Notario ad hunc effectum exhibitis à R. P. Lect. Habituali Theologia, Fre. Joseph de la Barrerra, Depositario Provincie Baticæ Sacri Ordinis Prædicatorum; eidemque R. P. Lectori devolutis: In quorum fidem, ego infra scriptus Notarius Apostolicus, præsens, licet Typis datum, signo, & subscriptione meis muniui requisitus in fidem. Hispani die novena ~ mensis ~ anno Domini millesimo septingentesimo quadragesimo secundo.

Per Notarium  
N. Capelli  
Sanchez Recensor  
Not. Ap.